

四庫全書

集部

欽定四庫全書

集部

遵巖集卷十四

詳校官給事中臣王鍾健

中書臣劉源溥覆勘

總校官檢討臣何思鈞

校對官編修臣馬啓泰

謄錄監生臣胡峻

欽定四庫全書

遵巖集卷十四

明 王慎中 撰

誌銘

素隱處士詹翁暨李孺人合墓誌銘

公諱祿字廷善自號素隱居士泉州安溪人開州同知
公靖之第六子開州公以正統辛酉舉人尹廣昌九年
擢開州廉惠得民以良吏祀于州學祖乾清曾祖貴庸

高祖進祺三世不顯其上世有以文學材行舉為同安
安溪教諭而初祖清隱公敦仁尤有勞於邑歿而見靈
有宋咸淳封靖惠侯建廟遵祀勅其額曰靈惠周顯德
中閩自為王清隱辟於閩王始議置小溪場為縣令安
溪也安溪為縣而清隱首為令方五代擾攘之際草創
建立經制粗備而拊循全安之邑既大治即謝去隱于
崇信里之拂耳山其歿久而神非偶然也詹氏望於安
溪非一日矣翁名家子有奇氣弱不好狎如老成開州

公卒于官蕭然貧也母林太孺人扶喪治墓生事百艱
翁感母之劬棄舉子業專治家雖少能不愛其力而有
揆物待人之信智清隱家佛耳山之多鄉村去邑治遠
開州公旅櫬還郡因墓晉江之羅裳山翁啓林孺人曰
便省墓而教諸子孫肄學莫如城居請勿以徙難母兄
勉從之其後兄之子源以甲科為御史副使澄以貢為
教諭弟之孫彬為鄉進士翁之次子洧以貢為高要邑
丞詹氏復蔚然望於城中翁之貽也翁以幼子任家奉

母以佚遺其二兄使就學為弟子員既而兄早世弟嬰
痼疾又為周旋其家政禦侮恢侵持緩赴急情款殫竭
力亦副之諸子姓憚而加慕事翁猶父副使公貴倨然
獨為翁屈謏謏然恭也治生常以暇為整不役數設機
意豁如也衣食取足自充無饕牟之慮國中邑宅郊外
墓廬相次偕作扉靚牖伋階碱潔緻不豐巧而風致可
悅翁在國郊相半以示達於死生之故而市塵不勝野
韻也在國宅與二三耆叟為逸會詠風嘲月俛朝仰夕

郊廬所伍山農海漁談桑麻鹽魚力作之勤相為勞苦
穰賽灾禁觴酒豆肉巫舞覲祝均其憂樂年齡既邁而
輩望彌尊鄉人無少長賢愚皆知有素隱翁始娶吳早
夭再娶宜招李宜招屬漳州龍溪而與多鄉隣也李姓
望於宜招故李孺人歸翁孺人性孝慎而刑于夫善執
婦道事姑友妯娌上順下諧庭內無間言靜而不媚置
側室秦馬二氏以廣夫之御能以禮自約使代御於夫
多子而育之甚均有鴈鳩之一故翁得頤適神志老而

益康孺人亦

以下
原闕

處士楊角山墓誌銘

是歲甲寅十二月二十四日戶部主事李君存孝將塋
其父角山處士于高魁山之原哭謂予曰傷哉纘之無

以寧吾親於土中也勤苦一經以起其家未及以一官
為親榮使其旅卒而不得視其含斂魂營營而不知所
如往盡然徒生即欲自隕又慮非所以死也疑於處生
死之間永抱憂悲閱祥禪而彌痛勉襄大事續其可以
死乎先生其謂若何先生若使吾親有以掩諸幽者續
猶未忍即死也惟仁人其哀之以貸吾死嗟乎李君孝
思之篤而詞之窮也予何以辭李君以三禮試春官魁
天下士晉江文學舊矣魁天下由李君始天下知李君

之文必知有其親之教角山隱約閭巷一朝趨然遠出
覽觀京都制度沿涉長淮大江之壯適游吳越觀其佳
麗足以自廣即不容外有大故固當不免即不免何必
守一室屋隅之下也士一日出所學通籍於君不得不
與親遠不幸有大故宜其不得在側而君深引以為悲
嗚呼篤哉由斯以言君之痛其可以平乎君方以文學
事業進顯於世為其親光寵將遠且大豈以得一銘追
死而其詞如此可謂孝矣君復哭曰以不敏之文僅有

司固吾父之教又有遺厚焉吾父任實好義中心獨出
於順祥充其心之所思莫非可急之人而處於卑約不
能踰分域之外過有所用其力也顧力亦副其心矣故
所儲不溢鍾釜而每能推於匱乏所履不越闌闕而常
有救於緩急不敢以色詞加人而譬諷所及聽者嚴於
呵責不肯以機數致人而坦露所懷親者固於拘維鬪
攘方挐械弇潛張而驟解默弭於微辯笑道之下者不
知幾人修於冥冥不可見之間以畀不肖今日蓋吾父

積勤累善之遺也。謂其積之而將享之遽以五十有八之年卒也。此續所為甚悲。而姑以盡心於土中。逭死責也。續又有請於先生。吾楊姓也。高祖副曾祖宗彛祖貞世居安仁鄉之鈔舍村。以力農本業。自給。吾父早孤。而墾於陳城居也。遂居於城之東隅。陳母故李毅齋公某之甥也。毅齋無子。故吾父育於李。而為之子。禰李而妣陳。鄉人之敬愛吾父者。知為李角山翁。而不知為楊也。惟吾父始配陳母。知之而繼室張氏謝氏與吾兄續亦

不能知而纘獨知之今將題名於阡作主於廟惑於所
稱之姓先生其謂之何予嘗及接翁然其遊京師也送
之郊觀翁先後無異容其微也不詘其子顯且貴也不
矜殆有常吉人也李君自言其父之德皆不為誣善信
可銘也若夫宗之必有別異姓之不相為後也在禮記
之矣李君雖欲徇翁之情其如禮何請志之曰楊角山
處士之墓而銘之銘曰

觀翁不取鈔村之田捐以與其弟兄所以專其情於育

者之義也事李氏父母生死盡力亦足以明其不二於心而報育者之德矣茲別其宗以反于楊維禮有攷匪倍輕忘翁其安乎即此山岡斯謂有子能善其親之藏

安人王室端惠林氏墓誌銘

林安人之塋也其夫王道原君相域于邑之下逢山治壙視役見星出入與其子均勞曰吾不得視其殮殯以王事也公之廢私久矣然何以釋吾情茲而不勞將何以用吾情卜日得是歲甲寅十二月二十四日庚寅之

吉行事道原予弟也拜且泣曰其哀惟中而銘吾妻始
先大夫封吏部考功員外方渠公為叔子納婦蓋安人
也予適以主嶺南辛卯試事過家安人入門方渠公大
悅謂某曰吾賢叔子決其必貴此女儀德固當貴可與
之齊矣道原學於予自少而言動有則在私宴無邪安
人能不以情媒見謫於夫莊慎有容家人竊伺莫得其
幾微吾母太宜人總一門之政好自勞而以佚遺諸婦
安人常先其姑承事趨動不敢以尊者之遺自荒吾室

陳恭人溫靚而慈在娣姒間每居弱處後安人遇之獨
執退謹知其夫之事兄嚴而然也安人資慧敏綜時物
揣求人情頗有役智而性剛卞以其夫恬毅遠俗不問
生事乃益摧縮不敢見其能一切近利殖產之計斂置
不用惟以儉菲自約而已內外事惟其夫之制莫適為
可否復善含鎮忍事家人巨細得失鮮以聲色徵發人
終不見其卞急也殂於淮上一女與二子同度同床在
側流涕長呼曰妾終不得侍姑太宜人一日之養耶身

死不足恨而廢吾夫代養之命其何如呼天者屢之疾甚已嘔出誥軸付同度謹藏之曰與而父別於京師手以授我者庶而父知我者之不懈也檢橐中百五十金示女子與同度曰此而父斥賣屋馬合餘俸而具此將以為爾婚娶之貲勿以我後事費斂用舊衣可也是時同床方六歲抱之手中瞑而後舍之同度歸言一家尊卑聞之無不悲痛太宜人至為一慟幾絕也同度知盡費其金治斂殯奉櫬而返畢喪當遣女同度發故笥呈

太宜人狄冠之外蕭然簪珥數物衣皆敝暗予與季弟性中為之營辦而後女得歸於是家人知安人之在官能貧而不愠也道原顧垂泣謂予今之畜妻子者非必仕於朝有祿賜於君宜亦能使之溫飽且佚吾再命於宦籍而室人終身食粗衣惡顛頓辛苦於邸舍道路以至死也吾其為不仁人耶吾思母之養不能釋位而退又不能御以如官所徒輟吾妻以歸使其客死吾其為不德人耶即令病時猶在邸醫藥有輔或不死是吾

貽安人以死也吾何以自逭於幽明之間嗟乎君之篤
於痛而疲於思則誠厚矣若夫以廉貧不能豐其內為
不仁以輟妻子之奉侍其母為不德則非學於予者之
所聞矣乃收涕而泣塋安人以其夫兵部武選主事之
恩得命其後由儀部郎中轉尚寶司卿今以使命過家
同度娶同邑四川右方伯黃葵峰公光昇之女女子嫁
南安庠生潘志遠同度志遠各有女子一人安人皆不
及見同庠聘建安故相楊文敏公之孫鄉進士華山君

肇之女安人在官邸預議不徇女婦之見以遠聘為難亦其識之所至云方同度以喪歸太宜人將返櫬于家而哭焉予為菽厝于先大夫東山瑩兆永慕之精廬道原在京師聞之號哭拊楫以不託櫬於正寢為恨予貽書為言古者喪車不入國凶事有進而無退往而不返之節且朝夕奠以几筵致生而奉之者在祔魂之帛棲神之主而非藏魄宜速掩之木之謂也道原乃愴然含恨而自慰茲就東山之廬啓菽而設柳禮也銘曰

以琴瑟和御之燕好為後而以甘旨左右之娛侍為急
此女婦之所難以名位修勅為可榮而不以貲畜腴潤
為足賴則士者有不能而安人之知及之嗚呼其生而
然其有所刑於家而然是皆可賢銘以昭之內懿有考
其勿諼其視茲阡

陳啓文墓誌銘

安平於晉江為望里里之望姓可指屈者不數家東積
慶坊之陳其一姓也陳氏有曰啟文字質義翁者以善

聞里中其季子武勺壻於王氏吾姑也故其塋某為之
銘翁卒於正德癸酉歲長子及孫相繼亡叔子武靖與
武勺始力圖之故其塋緩翁生正統己巳時方朴略未
習於聲華間巷壯者暇日力修本業以養生送死為福
不以治舉子學求進取為貴也翁少略涉書知大義而
已故絕意於聲華之途而鄉里所謂善人者力不得以
有為其為善僅克其心之所思而不能踰其分域之所
不至也翁之父元泓頗蓄田以遺三子未有命戒以析

而沒也二弟欲析之翁不能禁則使自選其善田而後
已取之多荒瘠也盡一歲荒者墾瘠者肥量田所入以
為出久之有餘以其餘貲附宗人之敏者貿遷于外日
滋月長翁不疑附者附者亦為翁盡里人共貲行貨多
以凶終翁獨終善生既日裕自隱於心曰吾身所自出
祖也身所由分族姓子孫也敬祖莫若豐祀愛族子孫
莫若教以學乃自置祀田塾田曰吾以上竭敬思而下
開詩書之業其心盡於此田矣友其二弟終始無間言

事二姊老而彌篤歲屢迎至其家進飲食以娛之每迎必數日決月而後返曰無幾相見也出見鄉人恂恂謹幅不敢以色貌侮人與賤少者均禮加誦焉翁所為善不能踰分域故如此矣娶黃氏先卒生子武瑩武寧今亦已卒黃氏之墓翁自為壙志曰只志生卒年月葬地坐向及平生一二細行足矣無他善可以厯顯者之筆也其識又如此繼娶鄭氏生武靖武勺鄭氏後翁四十餘年卒為今甲寅十月武靖武勺始奉翁塋于安南縣

蔡山之原與黃氏合而鄭氏同祔焉卜以十二月二十四日行事而來乞銘孫曾玄男子十四人多聘名家女翁塋雖緩而得銘翁又何憾銘曰

承厥貽不墜其基復培以菑燾厥後既遺之有且示以守其終曰寧其藏孔固維我銘之維其子之故

封文林郎監察御史鐵山公墓誌銘

嘉靖乙卯十月九日劉君志仁塋其父封御史公于邑施山之陽與母葉太孺人之兆合而以志屬余曰非得

子文孤將何以塋吾親始志仁君以松江知府俟調過
家公促其出者數矣君濡戀不忍竟得奉公之終嗚呼
孝哉公喪於嘉靖甲寅九月其喪鄉人爭走哭哭多盡
哀無遠不至肩踵摩接巷為之塞其存值公生辰姻黨
隣里皆來壽焚香盥祝莫不願公百歲其得榮哀于斯
人予頗怪何道致是公貴且長矣與人彌恭色溫詞至
論事細析毫毛精中膏肓大點小慧欲以情貌深厚蓋
其過非逢公皆剖露無所遁匿公既善得人隱曲又惻

恒懇欵恥人之過樂其有善如已得失所譏斥獎許嚴
於官府予奪人用勸沮於其言以故鄉人有相構為虐
者多自解去不至於有司雖富而御財有義往往所知
縱弛以振業乏窮嘗為衆人之母惡菲服食不邇於驕
佚故多悅其富無怨妬者生死得人之哭祝其道由此
可不謂偉丈夫所為哉貴富而為義勢便事易世之能
知公者止是矣公未以子貴家中衰貲落矣隨力所及
與人同勞逸甘苦一稱一孟遇有寒饑推共衣食微為

匹夫能得人死力所至有附其赴人緩急風雨疾病期至不爽晷刻同安之俗在弘治正德間以雄長俠武相夸尚其魁則聚徒衆置要約旅拒官府蒐瑣細族則罵訐健鬪視庭中牙鼠角雀勝者酒食鼓舞賀之耳公始好詩書士人語自悼幼孤老多難不習儒業獨發憤於其子志仁君才過人業既通聲聞日起公益延名師勝友厚與為禮非徒以廣其子之學亦欲風示里中知讀書可貴而弭筆探丸之不可為也處卑履約矯然有濟

物變俗之志又其近於仁矣志仁君為御史疏諍廟議
與小人獻諛侮禮者為異同章格不下數日或傳至家
客多以禍不測為公憂公抗聲曰主聖臣直其何憂御
史果不獲罪御史出為松江遣興卒迎公客皆從吏公
以吳淞美水土多珍物宜往饗饗吳中民吏善事長官
往使民吏一謁太守父逡巡跪拜足明得意也公曰使
吾在兒子郡邸中且閉門杜徑民吏何由見面日買魚
菜數錢併禁苦婦子僮奴口腹矣且使吾為饗家顧不

足充吾慾耶客謝愧興卒空返貽書松江勉以守官愛人而已其所以教子推此可知也公名恭字大受居鐵山之下故以為號曾祖雄正統間散家貲萬緡糾義誅劇賊賊焚其居與僮八人俱死官為祭斂鄉人哀而義之至今祖宏淵父朝權為學官弟子早世公獨與母王氏居比長娶葉贈太安人者也因奉母以僑于葉自力於菑窶艱躋之中忍閔耐侮竭盡勞瘁以持其家待子有立計數明而識慮遠非偶然倖邁而有今日也年六

十九繼室林氏男女皆出葉太安人長子存德即松江
君存業國子生女適蘇芾頌張銘郭顯有孫五人夢龍
從龍邑學生如龍為龍起龍皆幼施山之兆公塋葉孺
人所自卜堪輿家以為祥也存業與夢龍以松江君之
命來速銘服簾容毀非乞銘之詞不出又足以知公之
教也公孤時諸父弗友弱王母之寡謀殄其孤叵測屢
矣公幼即多智能如母教指潛形謹跡不踐禍機昏夜
出入自防飲食心動輒不苟竟免於害諸父知不可殄

絕則漁奪其產耗之盡公泣謂母曰是物他日兒能自
有之勿與爭其僑于葉辟家禍也諸父竟以凶終諸孤
淪落存者蕭然公洗沐拂拭之時其婚嫁為營貲產不
尤人所難哉銘曰

丘夷淵寘伏倚之質趨蹶徐行緩者乃疾謂天懵懵奪
予凶吉如衡移權鈞得銖失維子能賢由義教出化虛
為羸用儉節術彼寘弗窺偵其信誣闕觀于茲刻銘幽
室

封太安人慈儉程氏墓誌銘

予弟道原好言一時名士賢大夫於鄉同榜中每譽陳
思植君之為人言其才猷節槩能當人之所難克其所
為禍患事變足倚也君罷官最早為廣東僉事好繩嶺
南吏民以法由其母教以不可曲三尺阿比上下也嘉
靖庚戌罷歸拜母笑曰吾所以教汝宜為好官然其術
不可以久宦也術固當爾其勿悔善侍我左右我不汝
疵咎也君娛侍方樂而其母於甲寅六月不幸移書道

原言不得奉母太安人以終身而大父封主事公暮年
有悼亡之痛詞旨酸楚如不欲生道原持示予予竊敬
思植之孝而因知其有母之賢也君卜乙卯七月某日
墓母走伴山中以竹溪林君所為狀乞銘其詞甚哀而
有文予既因吾弟知閩有君又知君有母君復以銘母
惟予宜也何以辭按狀安人諱粹然程氏父謨賢雄于
鄉祖隨州知州亨有詩書之澤焉安人生巨家而澤固
存頗聞圖史之訓戒笑語不妄靜莊有儀入門而封主

事公某之母與大母皆在二母材性不同安人事二母
各得其意母李氏勤於事譽其婦曰無惰事大母蘇氏
嚴於禮譽其婦曰無愆禮故其夫以善事父母聞其為
夫育同祖之孤姑撫之猶子敬之固姑也方貧能使內
外無菲缺而銖積寸累化約為豐不待其子之貴家駸
駸起矣子貴祿入日有餘籌廢舉權贏詘其事纖密而
不煩築室治田多而益辦主事公茹嘉服珍怡如也其
子謝官亦有以為歸精敏有過人顧不以巧知見稱親

屬長幼見謂有德淑溫孳孳然恩意接遇人有加也富而彌儉老而能勤勞於陳氏令善終始純備矣方安人舉僉事君年三十三矣又無他出獨子而晚顧子不以小慈敗義課督不少貸僉事君既賦材異人無滯課以煩師櫝猶時時以小嬉閒情受母訶撻也舉男雖晚僉事君早貴以工部虞衡之考得封御安人如官邸食四方水土腴美之物狄冠展衣榮於闕下都膺腴以閑其家剗剖綜覈頤使指授尊於內外族戚之間殆十五年

所享顧大愈於早有子者亦其教有以篤斯慶歟僉事
君名梧女四人適李魁商周竣夫蔡宇安李俊卿孫男
一人主事公名之曰紹長孫女許王桂戶部主事健之
子幼二人未許人其葬在八都蔡坡山之原安人居常
好言古慷慨烈節事於今賢尤篤也僉事君權木江陵
時湖廣巡按御史按顯陵內臣不法事急反為所中逮
繫赴詔獄安人問君是中御史者誰璫何許人也君答
閩人也安人怒嚼齒吾閩何得有斯孽慎勿與之通顧

御史以持憲蹈禍得微自沮悔耶君厚資御史赴逮之
費歸為安人言無悔狀安人喜加他日昔怒始復嗚呼
是可銘銘曰

孰不有子孰不多有孰享其祿以昌于後亶斯令享自
作之究傍羨側睨孰苟貴富庭特與祥由牧與守著此
銘詩以告他母嗚呼斯石其勿以朽

封職方主事蔡梅園公墓誌銘

武選郎中龍溪蔡君奔喪過泉匍匐造子輒哭輒拜哭

不起曰文也罪罰不得視父斂五內崩摧終無以自贖
忍死治墓請求贖於君子至漳久之使來曰卜某里之
原將以是歲乙卯十二月某日襄事君方以文學操行
有見於世所以自贖者遠矣奚所託於予文按狀公名
廕字德流別號梅園漳州南溪之蔡望於龍溪公之宗
尤望於蔡然世未有顯以系傳遠族居繁為望爾祖某
父宏安皆含和履厚自樂廛田無聲華之慕故公少不
習為士而稟知獨異軼宕多大言趯然有不安一室之

志曰丈夫生欲何為而沒沒老環堵間為無能之人耶
舉子業拘繞我固不樂學泛覽史傳頗談其成敗得失
抵掌誼譔學書不能工曰吾不能為時書篆隸古體可
學也無師授而偏嗜獨契晝坐夕卧畫被摸腹落紙輒
喜他人評可否工拙不介也繪畫嬉涉為娛不入品目
而往往有韻踰嶺遊吳越登虎丘吳山高頂太湖鉅浸
浙江驚潮駭目蕩心狂睨內釋絲竹妓女滿席意不在
也久之還家母謝氏譙之曰而不工不農放浪遨跡終

不謀家乎跽應曰致富之術在兒目盼手畫間第不樂
為耳今知奉慈教矣因出子母錢若干籠百貨視時緩
急人棄我取為權間出奇變時急不趨人取不競卒以
緩致急以棄徵取倍利獲贏盡入公手諸同利者服其
知而嫉能也曰蔡梅園命愈耳公聞笑曰是在計然策
中非心通性靈不得也渠不達而羨我命宜其終不我
若矣術既通時時有所寬捨求自遠於營財沒義之嫌
精小兒醫為人治多不據方投藥燭艾火灼之十不失

一有請必赴或以金謝公曰若視吾售醫者耶所以治此業而樂赴人之請者欲以多活裒為有濟於物也謝者愧拜而已三子伯宜季懷仲武選君也嘗指仲子謂內嚴氏曰蔡氏之顯在是兒矣使伯季持家而課督仲子以學果舉進士選為翰林院庶吉士授兵部以其官封為職方主事嚴氏封太安人公雖意愜不負素所期亦不為溢喜蹈世人夸豔挾恃之過約敕子弟僮奴毋敢苦里中及濶官府請寄鄉人咸尊貌之不以榮貴故

嗚呼賢哉公以嘉靖甲寅五月八日卒年七十三女三人嫁周某徐某劉某皆名家孫男七人始武選君以主事奉使過里為公壽里中人爭持殽酒來賀公遍揖賀者曰公等請言乃公所以得賀乃公為若受殽酒客各進所言大抵多譽公善教樂施好義急困之報公不頷也最後有言公多活性命襁抱中嬰孺無橫夭是所以有今日公頷之顧謂曰活人豈能多惟此心不負可與神明對耳客皆懽服於是盡謝諸殽酒而大置酒酌賀

者里中人無不霑醉出門舉手嘆曰公真德福人吾輩
不及也庚戌歲敵入邊犯內地京師憂甚公貽書武選
君為言備禦防守大計以籠貨灼兒為況曰使籌勝決
機如吾權百物廢舉帥布卒扼害險據形勢如吾審穴
舉重而輕者赴攻本而標者從兵事不出此矣武選君
佩其言施之謀議中微鉤要大司馬多資用之嗚呼公
雖不顯其有濟於物又專在活數小兒之功耶是宜銘
銘曰

或遂其外而培其內以為神懟有葆其醇而抑不伸亦
觴於人與人者偶惟公之有靜撥其幽克對不負宜篤
爾祐以昌于後

中憲大夫雲南按察司副使楊西渠公墓誌銘

西渠楊君名逢春字仁甫泉州同安人予舉乙酉榜同
年友也由己丑進士授杭州府仁和縣令父喪未至官
服除為蘇州府崑山徵入授南京道御史出為廣東按
察司僉事母喪去職起復僉事為四川按察司擢湖廣

布政司參議積資二十四年始為按察司副使未至雲南卒于參議之官舍年五十六卒之二年為嘉靖乙卯十二月十六日塋于邑之某山君居官竭心奉職凡職所當事事悉力從之事有犯忤人所縮首善避及勞險不可必濟偷則苟安君必引為已責曰職所有事也直前勇赴不反顧沮悔常為巧者所目君初不知久之或知亦不變也曰使衆人智而我為愚不亦可乎且使我
不愚則意貳力分於事事亦不能如其職矣是吾正有

賴於愚也又烏用去之崑山稱富縣前令多以富自沒
有能不沒於富而諸獻遺權力猶不敢裁罷君曰費人
之財以買聲市恩而詭於不貪人之費斯孰執其咎一
切罷之其政寬民急吏賦籍獄牒胥吏不得竄手戶受
賦重輕獄當決縱榜示出無不愜服不復求吏知權不
在左右也撫按異意條教難遵君据理疏正當以理為
君奪舊令最以故方伯慈谿楊子器公為賢至是有前
後楊之稱盖以君繼方伯公也江南北諸郡邑以歲時

餽留臺為常君入臺餽不敢至曰是嘗為崑山盡罷諸
獻遺者不可溷也巡視江南北倉庾汰黜庸貪風采振
疎所部廣屬吏滋多人人如君臨之在廣東分巡嶺南
道疆界遐曠徭獍蕃育其中數為民患故嶺南兼有兵
戎之寄法弛日久將玩卒情賊白日剽通道行旅梗塞
相為蒙蔽以苟歲月而已君首舉綱維責郡縣以修政
息民之要然後易置將領選卒訓練指授方略自是賊
發輒得野聚荒村開戶而睡矣在蜀領鹽書專以鹽屯

為職最號煩劇利源所在豪右穴之君綜刷成額按籍
考要年侵月虧瞭然可見偽巧無所飾課入日進時叙
州戎縣都蠻畔殺略吏民長寧戎珙一路邊無居人監
司相顧莫肯發口君獨抗言且設禦取之策撫按相與
謀非楊僉事不能辦此會檄以都蠻之役委君君至益
用耳目知蠻敢為不靖由屢撫養其驕桀之性非盡勦
之後益不可為度險阨分兵四路約期進勦君復計蠻
素以撫狃我若因而誘之宜必我狃得之易也陽撫其

四鄉而以勦二鄉為師名果得四鄉最桀者四十人以
來盡殲之用是兵入有功俘斬以千計湖廣分部潭邵
之間戶多亡逃客戶据其田逋稅猶責主戶之存者故
亡益多而逋殆不可校君為法使稅常附田以行田與
稅不得相失而互為有無也平賦均役通滯節冗事集
而令不煩其在職獨久復因暇日興起禮教訓勵生徒
士奮於學者彬彬然盛矣所至盡心於職大較如此故
其以憂去嶺南以遷官去蜀民皆若失所怙相與泣曰

徭蠻復苦我矣其卒於湖廣民走哭相踵不絕喪歸罷
市舉聲以過喪出境乃已君世不顯曾祖某祖某父某
皆以謹朴守家君貴贈父為御史封母某氏為太孺人
君天性孝友與弟逢陽終身不異財守官廉約所餘俸
悉畀逢陽為家逢陽亦不敢私君之內子封孺人洪氏
能無吝情一門友恭雍如也於交游篤久而不忘欽欽
在鄉閭間敬老字幼不以貴倨有人所不能及也君在
崑山邑有故相當國子弟僮奴暴里中君逮置之法移

書都下懇惻侃切言以德為愛之意故相報謝暴者終
君之任益戢嘗欲奉其父祀于鄉賢祠邑子論有異同
君持之故相滋不悅然未嘗敢短君也為御史值東宮
備官僚時相引置私人物論大譁君首彈之相權寵方
盛莫敢齒及上覽君疏嘉納為易置所引用者時相氣
大沮欲中君以事而有所畏遂以僉事出君臺中在嶺
南韶州守倚故相大為奸利不法事總制撫臣憚相權
益優異之君白發其奸撫臣搖手君曰坐視民患不除

不能一日安於位除患而以禍去心所安也撫臣內惡
其言而奪於君之法韶守竟不免此皆其悉力於職人
以為愚而君嘉為之者其在蜀都蠻之叛非君職也直
以憤在職者偷事病民遂以身任之功成而賞不及反
以得謗久而後白尤人所為愚者也然君仕雖不速化
而正論常歸之使昌其年仕終當達視巧者遲速之間
耳而遽止於此豈非命也夫子二人長士遷娶臨海尹
林大樑之女次幼聘某女嫁某銘曰

淑之湯湯下流長兮魂飛于上優昭揚兮歸旒翻翻有
攀傷兮復魂故丘固且良兮維吳與蜀嶺之陽兮山阻
水逗莽異鄉兮尸祝報享酒牲芳兮胡必茲丘歸斯藏
兮詩于墓門答精爽兮

奉政大夫刑部郎中蔣悟菴公墓誌銘

是歲乙卯十二月六日奉政大夫刑部郎中悟菴葬其
子郡庠生陞奉郭白峰公之狀來乞銘鄉先生家居能
急人之病不愛勞勩求瘼搜隱籌所宜裒振出危苦語

感動在位平鬪者曲直以情款諭人於不爭使直者得
曲者亦不敢以為失若是者惟悟菴賢其沒而上下之
間無有能為強聒說教者予蒿目視人之病不能揀方
追思公又烏辭銘按狀公名孔煬字君和正德丁卯舉
人登甲戌進士蔣氏自浙之長興縣徙閩國初編遣從
軍故籍隸于衛其姓視他籍最著高祖佛保曾祖遂祖
道父文權以公貴贈奉直大夫南京戶部員外郎母何
氏封太宜人公生而敏明有識量比長益習億物揆事

審而不煩方貧不足能以政治課業之暇營父母之養
常若有餘始仕為通州知州州繁庶甲畿郡材賦刑獄
簿牒填委民吏仰視側睨公為之如素所熟會計贏縮
節浮益虛財賦贍足宿府猾吏無得竄其偷偽兩造至
前情輒披露情得則稍薄其罪庭中諠呼稱平久之犴
狴為空都憲重臣監察臺史相踵奏薦以公才可大任
每行部未嘗至通州曰有賢長吏治之矣賢聲出畿郡
上尤加意學校表厲名教課諸生以業躬督勸之獎識

髦後後皆成大名如今少宗伯崔公桐大司徒馬公坤
參知錢公嶸方伯陳公堯並所素課豫識士也將滿考
奏績贈員外公計至民會哭奔送殆空四境州有沙漲
地宜田宣家唐家二壩宜隄公墾田築隄則漲有新畬
防有淫水是一役而興二利也募民佃漲地收其直充
役費役且舉聞計封題募金以遺後人其盡心於民推
此可知也去職蹟譽益白銓司遲其至將顯用之服除
赴銓公謁而已不私候貴人之門竟以常調授南京戶

部貲外郎積資遷郎中公靡事不周尤善財計司徒倚以為重賢聲又出留都郎曹上迨今上新政釐整弛敝會天下財賦獨以浙江江西蠹耗為多思得郎員才稱任使者一人司徒以公名上授璽書以往公簡別屬吏分遣督逋自執要成以稽其惰敬晝夜蒐故牘得乾沒鉅贓株本則窮其節目枝尋條剥所得積逋溢於新賦謂藩臬諸司曰茲使也以督賦為功急則傷民緩則病國吾今所得財皆其已出於民而未入於國者賦集而

民不擾庶於國有裨哉吾不敢以為功惟傷與病交免
可以還報矣比反命入奏上嘉其功特賜褒美命吏部
寵用之遂改授刑部郎中坐是取忌年四十失官知者
旤恨之既廢事何太宜人承顏順志服勤左右每食躬
視和飴嘗旨而後敬進之常自行廚匱與竈養漿婦分
役家人勞苦之公曰使堂上享之而甘吾獨惜此耶寒
暑衣裳手振領循袪非潔新溫輒不使近體衾枕舒拂
夕以為常侍疾省藥物尤謹或終夕不寐與弟孔虔居

不忍相遠罄官金買田宅歲贏月羨久益增廓折半均
取不以尺寸自謀猶擇腴美以厚之愛弟之子廷均踰
於愛陞也別置田七十石市屋五間資廷均為讀書費
何宜人安樂之曰汝撫弟姪如此吾復何憂孝友之實
播在閭里誦傳相嗟嘆以為不可能也其餘恩足以及
族人赴急持危情與力偕至孤弱不能立貧無告咸賴
公以不失所邦國稱睦焉嗟乎公仕則勤於民廢亦施
於有家出處皆有所立名位不亨而心跡可述矣其又

何憾配陳氏贈宜人繼鄭氏知府鄭公良佐之妹前卒
無子繼吳氏封宜人子陞娶南安黃氏故通政黃公河
清之姪女女三長適黃衷故教諭黃公達之孫次適黃
守吾知縣源之子三適黃思詔俱邑庠生孫男應錄邑
庠生聘御史洪君庭桂女次應銘孫女長適鄉進士鄭
一鳳子材立次許參政黃公潤孫國俊以壬子十月卒
距生丙午享年六十有七墓在西郊白塔山之原公所
自卜也銘曰

雲者為雨可以徧下土既族而風之方施而處其在水為澤而滲不為川與河浸也不多以行于家終樂且嘉頌奏則麓和有母者皤髮白而顏酡其委其蛇門內之實鄉人揚其華其又何嗟歸安斯原銘之使不磨

胡榕溪暨李孺人誌銘

友人胡子敬君禮為靖安教諭嘉靖壬子歲乞于江西督學使者曰禮之父老矣為一邑之子弟而遺吾老何以為心詞迫容蹙使者鄭公以子弟不可一日去賢師

乞再三四不許踰年癸丑二月其父榕溪翁卒訃至子敬號呼欲絕不敢怨使者而自悼不釋是歲乙卯十二月十二日塋翁于晉江三十五都許內山之原以其壻江貴溪君之狀來請銘安溪著姓胡氏在甲乙始自光州入閩不詳其世世以朴約相傳正統間最以仗義好俠有名曰欽者能以其貲為善闕事天順戊寅歲大饑出粟千石助賑上聞褒異賜以冠帶敕有司建亭旌之擇壻得蔡虛齋先生實識之於齠稚時而先生果以理

學為一代名儒欽生英德教諭誼與虛齋以內兄弟相
資於問學有聲庠序貢授遂安訓導積勞擢英德卒于
官教諭公生翁名道字宗緒娶晉江南雄府經歷公英
孫女李氏英德公之歿翁千里扶櫬侍母陳太孺人能
忍痛任勞役備極艱劇竟襄大事事母盡其力未嘗業
儒以其質性應物少則順悌長老至壯無違行強艾敦
交睦與無失意於倫輩耄期撫接卑幼尤巽抑不惰天
資近於善祥厚閭閻不踐凶機非講擇可否而自合也

居郡城之衢鄰叟里子日相過逢舍中坐客無空日或

一日不舍客則之他舍杯觴娛日不知

闕

也抱孫

長息婚嫁有無茫若夢中事囊

闕

以急

告倒囊與之比客至當具

闕

不問也

孺人曲順其夫琴鼓瑟應好合雍如也翁喜謂所知曰

使吾內有微忤亦安能樂如此耶子敬年十二三有美

才試輒冠諸舊學老生屢失有司竟以貢起家翁終始

不以喜愠關意襟度夷曠曾靡疑吝無筐篋錙銖之殖

而有本原方寸之積所以貽後者不啻矣翁生成化癸巳行年八十一孺人生成化甲午卒於嘉靖辛丑未塋也至是與翁合焉三子長禮靖安君娶教諭莊海之女繼白氏次麒娶知縣劉信之孫女次祐早卒女三人皆夭孫男一山一潮一崑一山聘司訓王甫政公之孫女孫女長適晉江薛應會次適貴溪知縣江萬仞次許晉江庠生蔡雲嶽次許安溪庠生唐音之子道一餘三人皆幼翁淳心質行永年令終絕惡斃於家邦老而益為

人所願居常履順無奇也翁嘗受安溪訓導周君某寓金一篋隣火翁適他出家人皇遽避火多所遺失寓篋獨無恙周訓導聞災拊心嘆曰亡吾金矣一日翁持故篋昇周曰金在此周驚喜如新獲以十金為謝翁艷然曰使吾為金獨不可利此一篋乎而受十金也周感服再拜斯亦奇矣銘曰

轆轤者擾乎囂囂者矯乎決道之藩而騷性之傲於天之人小者乎復撲而去藻外黑而中皦謂翁之生也貌

乎其原。膺膺其坎窞。歸斯藏者。冒乎。

黃濱溪處士墓誌銘

安溪參山黃生大本稚年而志學。余嘉其志而許之。游其廬而篤可教也。余又因生以知黃君善繼君之先世。皆不仕其父。漆養蚤世。君少孤。不克就學。而所居有山水之美。田園之饒。守其恬質。以隱家。近桐溪。臨水垂釣。或放舟獨往。縱意所如。不復知有世上之榮身外之物也。故自號曰濱溪。黃生從余遊。時傳其說。歸與族人言。

參山固朴處族人多不為詩書語舉以黃生為笑君獨
好聽其說久之則幡然謂黃生曰吾等僻處窮山耳目
無所聞見徒竊活耳何由得見此人以發吾蒙也黃生
以為言且期來見已而以母病未果來已而自以疾不
果是歲二月七日則黃生以君之訃來矣予聞而悲之
而黃生復以君之墓告曰乞一言以志其藏蓋君竟以
無子死而其存則與嫡母林氏母方氏謀所以嗣其家
者選於屬之最親而擇其愛者大任以為嗣書以遺其

其妻莆氏曰我死則大任吾子也黃生慰之曰世父何遽謀至此姑自攝勿及此不祥語以自傷也今既卒而大任奉其治命以終三母之托故黃生為營其塋而圖所以不沒其人者以屬予曰是其生悅聞先生之說願出門下而未得者先生尚哀而許之以幸吾父於地下也余既知君之意如前所述而為君之子者又吾徒之弟大任也其可得辭君字士考生四十有四歲而歿歿之後一月而生女而以是年十二月十九日塋于其鄉

員潭山之源嗚呼其可哀也夫然予觀世人老而無子者猶不知所以自決而卒制於他人之手繼嗣不定以敗其家而數其祀者往往有之君獨能以盛年為遠計而其選擇之慎付受之明使狡焉思啟者不得搖乎其間亦有可賢者與銘曰

禮之所出爰輔以律本人之情厥正而恚無嗣之凶有續其礎非無倫序曰愛之必生而宜之其死也謚爾克有子在計早乞我銘其幽有如皦日

處士順吾王公配龔孺人墓誌銘

順吾翁之卒在嘉靖癸卯十二月其嫡長子綿緩前卒
庶子績約緩續皆弱且幼丙午四月配龔孺人亦卒乙
卯正月二十五之吉四子與綿之遺孤孚中始克奉翁
孺人祔于龍山考妣之兆四子已納室有子及綿緩之
子有孫十二人孚中亦有子一人墓雖緩而周事合禮
庶其無悔翁名陞字德敷父瑟齋公瑞昌母蔡孺人大
父義齋公永堅曾大父明軒公庭中皆以好義力善儀

表一鄉世以為樂不慕榮進翁少而敏悟過人讀書不多誦數已熟久而不忘母患其弱以書為勞也讀輒禁之嘗潛投里中學舍從師授書母輒遣人譙讓其師是欲殺吾兒耶里中師相戒莫受王生卒業故翁終不得以塲屋之業干有司性固好書史傳雜記稗諧小說汎覽多識其言體事切物而貫以義理遇人輒言之為父兄言慈友為子弟言孝恭援證宿事昔說聽者莫不竦喜講禮修儀居常矜整動輒約人以容節好入里中學

舍問子弟所業而課之故里中後生遨手足褻衣冠學
舍子弟業鈍惰艱於應課者往往走匿里中山吉有資
於文詞如聘昏勸學莫死銘墓之作多以翁為屬善為
七絃彈中年遊金陵以琴有聲士大夫交下之冀聞其
音遇意無忤為鼓一再行而已秀目修髯資渾朴而有
韻致解紛弭鬪不厭強聒說而罷者尤多郡縣知名常
召見之言即為言孰利當興舉而不言其不善者前守
四明屠東厓令山陰錢立齋兩公並優禮之屠公復加

獎激昇以郡檄主一鄉之約翁納檄郡中為屠守言勸
誘一鄉之長幼此未死老氓所宜盡心表率督勵則非
所任守嘉歎之以為質而近厚也始蔡母禁翁讀書誠
患其弱亦其家有餘衣食無覬於外安於分域之內以
自足也翁不巧謀生晚而多子不無以家迫為戚賴其
疏綽不急之度有以自寬亦嘗追憾見禁其母不專於
書而慨然有羨於榮貴之會也吁可念也龔孺人尤舒
遲而無機祥懿之行周旋始終不憂不怒宜於一家與

夫偕老而同德翁雖隱約不顯然無害於性以全其天
永居世之齡而久其善鄉之蹟又何憾羨於彼此也翁
四女皆嫁名家子而仲女之夫黃物備博學有文詞以
貢歷官為王府教授宜為銘翁之子孫謂某寔維持其
家不負顧言之託必以見委是則何敢而銘其何可辭
王氏有姓於安平所可知者元之將季自二十九郎三
十一郎而至明軒公其遠不可詳也翁嘗命某以訪譜
之責從宦中外始得莆田王譜而通之其為晉江派者

二十九郎三十一郎之號灼然可據其他官行名號猶有不可質者故某與弟惟中與其族人參政鳳臺知縣一貫序宗盟而未即合譜不及以講于翁斯責未塞也王氏祠堂由翁倡為之制法有未備某方嗣為之墳兆之在東埔者某僭竭力其間以畢翁志是日銘翁之壙庶無愧於幽明銘曰

於邦國可以有為而不得為於族欲以有為而不及為非智不足有物司之惟其繩矩於家牖携於鄉是亦謂

為奚其為為而後謂之為

封戶部主事南園張公墓誌銘

公名良寶初名文會字廷際泉州晉江人高祖自牧公仲端由安溪徙郡城曾祖進修公宗應祖寬以鄉薦歷官終應天府學教授別號慎齋德學為鄉之先正父仗義公秉德嫡母何氏慎齋公為山東茌平教諭最善其邑人邵光祿公故為仗義公納其孫女是為公之生母慎齋於諸孫中尤器公授之帶一圍公裳一襲顯示屬

意云此兒必興吾宗慎齋公久宦而貧公以經教童子
自給劬學不廢旦夜博涉他書業成矣而屢躋於有司
因改業以謀祿仕居家躬行孝弟率屬同姓大書忠孝
勤儉于祠堂而梓慎齋公遺訓子姓人授一編子姓中
少有過差輒舉祖訓以警勉之撫弟之子如已子推父
之居以居之追遠之敬嚴於祀事每厥明少長未集公
以衣冠拱立祀先之所畢祭而享厯厯舉某祖平生曰
吾張氏以孝弟立家慎齋公益篤友于仗義公不替家

法兄弟終身無間言念德敦行吾與若等責也戒諭敦敦懇至羣從皆化之張氏一門尊卑殆百人雖析屋殊爨雍睦如一家衆人不知其孰為親疎也與鄉人處一以忠信為主而綜練世故洞悉人情鄉有鬪訟或官府不能平質公一言而解其誠心足以感之而明達能中人曲直機要曲者自為公屈盖未仕而率族睦里之行已施於有政矣年五十赴銓得吳江尉邑稱富劇公佐理有餘力邑長開州王公一以政委之王公受成而已

邑以大治郡守天水胡可泉公英察難事倚公如左右
手郡屬邑令皆甲第名流其所編徭冊民屢愬不能定
胡公盡以託公比冊出無復愬者督賦不急不弛常先
他邑辦集有巨姓逋租萬斛重賂求緩公麾去之治之
益急舟運稌載一朝而逋畢輸以敏慎仁恕屢受臺獎
而已於卑位不能薦之也高御史世魁直諫忤旨就所
部逮赴詔獄屬吏憚怯避去公獨周旋其間諸屬皆義
而愧之在職滿考值仲子行吾君志選登己丑進士即

棄官歸行吾尹諸暨及為戶部郎出知常州府政業卓異時論歸美之皆稟公之教也以行吾戶部主事之考

得封嘗一視行吾

以下
原闕

久其祀行吾君迎其意以所分父田

充慎齋公烝嘗公甚悅之於母家尤篤往返京師必由
陸至荏平謁邵氏家廟厚遺其子孫邵母諱日必屏居

自傷淚蘇蘇下終老猶然德履之劭重于鄉邦有司鄉
飲酒禮延以大賓雖以貴壽蓋尊其德也平生無病忽
遘疾家人請用禱禳公不許幼孫或誦論語禱爾于上
下神祇以為諷公曰汝未讀下文邪病中聞堦之訃憂
其女甚及女扶夫櫬至家相慰苦而公亦逝矣卒之前
夕訣諸子孫皆立身守家大要言畢從容委化可謂考
終矣為丙辰十一月九日也距生壬辰享年八十有五
配薛氏封安人與公偕老長子志魁庠生先公卒娶諸

葛氏次常州君也娶黃氏繼娶侯氏皆以夫貴為安人
志騰娶黃氏志顯娶史氏志尹庠生娶林氏女適博白
知縣李士絢孫男八人守質守為守臣俱庠生守介守
孚守藩守教守嘉孫女十三人適許皆名家行吾君遵
公之教友和諸弟誨誘子姓彬彬多盛材將益昌其世
而公積慶詒謀之善彌遠而光矣以十二月十七日奉
公塋于所治之藏而乞銘於某曰公遺命也銘曰

棠陰之丘蟠紉其虬築之俅俅外曠而中幽生乎樂於

斯死也藏於斯更千百世其勿休祥嘏是速

蔡母嘉柔孺人溫氏墓誌銘

王氏與蔡氏世姻子孫皆世以姑舅之講為兄弟兩家
之好非一日矣吾先大夫與蔡密齋公闕輩兄弟也

密齋之子明達發達復呼予為兄故其墓母溫孺人以
銘墓之文為請而不當辭孺人歸密齋公而其父略齋
公泗為邑庠生居家好禮母吳氏性嚴孺人事舅姑無
不當意間居寡言若不甚慧臨事斬斬有條理臧獲經

其指授則課計見效或不得命偶自為之輒缺敗妯娌有所營辦視其舉止赴之而已蔡氏族指繁諸婦多名閨或以門第矜倨孺人及孺人為婦久之賢聲聞於宗諸矜者顧媿敬孺人悔其初倨也家方起而密齋公沒孺人年三十六耳三子皆幼當憂悲窘約之際撫孤持門戶如秋葉融風凜凜將墜能維護其長子自達治密齋之墓而乞銘於故給事史筍江公曰使賢人誌其藏吾夫子瞑目入土矣維是未亡人之責在三孤也未幾

自達旻孺人哭之殆毀忍死自力雖衰而志不憤育二孤鞠瘁朝夕不以姑息妨督課拾掇細碎積贏致豐二子行貨吳越中貲殖殷起孺人亦病矣方篤召二子曰富不忘貧則富不入於貧矣慎無忘玃玃危困時也又曰吾起貧家最知貧家之急汝則割田數十畝待族人之飢者則我可以死矣二子就床下書佃名歲得穀三十石曰義田孺人視書畢遂瞑實嘉靖甲辰歲九月七日年六十有三今其子逡巡在鄉黨間斂退悞縮無敢

有教言修行猶思母之訓也墓在三都張林山之原與
密齋異兆明達娶伍氏發達娶許氏皆未子明達女三
人長適王繒次適參議伍公鎧之孫祖誨次許黃志淑
發達女一人許黃士儼女三人適伍宗道柯理許釗墓
坐卯向酉為七壙二子婦異日皆將祔焉墓之日為嘉
靖丙辰年十二月二十一日銘曰

儉能起其家之屯惠能恤其族之貧匪直也婦其才實
夫猗嗟乎令人

陳約齋處士暨鄭氏墓誌銘

陳約齋君以嘉靖丁酉四月二十日卒年四十遺孤長者十歲次未能言也將卒謂其室鄭氏曰勿遽塋我室謂君慮貧不即舉也君搖手曰第待之鄭不得終請已瞑越六月十九日鄭亦卒至是嘉靖丁巳十二月二十六日子長者始以丙辰進士塋其父母于邑之湖頭山周事飾禮人始曉君所為待也晉江有陳氏著矣遠祖孚中公好學能詩遭元季喪亂仕不得志終同安惠安

順昌三縣令入我明而章應公首膺進士科為郡衣冠之倡歷榆次繁峙安邑三縣丞以才廉召為禮部儀制主事太祖閱功狀大異之璽書褒美下本郡榜之里門以寵之焉榜猶藏于家永樂間道曾公以進士選為翰林庶吉士授雲南道御史澹于榮利乞為校官以名節終是為君之四世六世祖高祖某曾祖某父某皆不仕母張氏早歿二兄曰謙曰恭相繼歿君獨力貧以奉母而撫幼弟任方弱年已勝壯子弟之責家最窮空自以

門閱世舊所為自力於窘急以給朝夕雖備嘗辛苦而不夷於市井溷鄙及涉事日更識恢知益人往往以事赴之不以昏夜風雨為辟忿戾方糾談啞渙折謬迷難諭指畫開暢門戶日尊忘其瘁替陳氏故里正所轄戶猥多强者難馭乏者難輯宗人屬君持役府縣每下追召徵率能使强者不叛乏者不逃賦集事辦縣官屢賞其能轄戶甚安之宗人咸喜舉酒屬之曰微吾子吾宗里正敗矣事有急時間出權數以濟或咎君以少欺君

曰吾以濟事而不以舞人少欺何傷性侗儻善羣杯羹樽酒之聚謔洽洞欵人人如得醉飽大會廣坐得君以益懽每集君在後至者聞笑聲曰是約齋耶爭先趨入少讀書不能多而札牘來往語言反復動有章采皆從耳剽得之其聰聞警解有過人者陳氏指最繁君年未盛已翹然為一姓之特亦其所自致然也然心顧獨善謹守禮法踐繩抱矩之行子幼已訓責有法進士君居身莊畏粥粥如恐墮足失口人謂不類其父不知遺教

有存也每置子膝前語內曰此英物也踵諸父而起以嗣二祖之芳烈必有屬矣時君之從兄西郭君蕙以御史有名臺中所謂諸父也鄭氏婉嫕而靜兩人氣度若不入而相友如賓終身無忤言違色絕不以貧故微懟其夫其竭意承順若恐傷之宛曲內至有賢婦人所難者進士君悲不得事其父母雖以顯塋悼恨刺心如不能生故以墓中之石托予曰將藉此以逭死予方不知所以生而能為君圖乎君學於舅氏鄉進士鄭君良璧

超詣卓出文為諸生冠四方之士將知之而謂予獨知其文君之所以托余者過矣約齋君名寬字存太長子選進士君也次子會進士君娶李氏繼娶曾氏故嘉興府知府曾仲魁之季女會娶某氏君勇於為義故處約所勇者非不足著其最可著者嘉靖丙申丁酉連歲大饑民飢多餓死君請縣發賑自實轄戶率之詣縣受粟槩量平均餓者得粟皆活嗟乎君所以有待而塋非徒知其子固有以自知也哉銘曰

銘詞
原闕

贈刑部主事吳雙湖公配金安人墓碣銘

夫踵躅而貴人之所同欲也而降之予奪制乎命象賢而肖人之所得為也而修之情勉視其志然世常急於欲而後乎其所以為至乃越力分以與有制者角盡棄職性而茫不加修或幸而遂其所欲墮盛數美比比而是俗顧以為能似其先而世其家也其力為善而遇不顯者且歸以析薪弗荷之愧嗟乎成敗之論方眩而肖悖之實不明為子孫者忘所有事而自失者衆矣樂清

吳雙湖公九仁字可為故尚書章恭毅公綸之孫而故
方伯公元應之子也恭毅公忠義風烈巍然一代名臣
而布政公廉直才敏為名宦後人肖之為尤難而雙湖
以儒衣老死賤貧矣予獨以為肖子將以闢一時成敗
之論之惑而使世之為子孫者知所職也公行篤言信
不忍損直以徇物不憚矯俗以亢己以佞巧為穿窬之
術以鄙吝為興臺之行天資近厚主於易良遇事不可
意人有不善輒面艷語怒若稜棘不可靡磊落濶視蕩

無城府舉世何足

闕

逡巡不少爽絕不預人短長鄉隣

闕

其

曲直不為嫌避買交市名心所深耻人以乏且急為告
竭其力所及副之其性嗜義而自以賢哲之後知有重
職而不敢惰棄故也少讀父書發憤致精師悅其專同
輩畏其苦刻也宿說舊訓彊記熟思能演暢其旨為邑
才弟子員文必傳經不喜為附枝蔓葉後進浮靡者每
躡之公亦倦場屋而謝去矣以其專苦用之於詩結社

鴈宕山下搜奇抉勝琢雕倡和其句冰寒雪潔有騷人
隱者之遺風稿至數百篇可傳也以公之好學使不自
謝去於世之所欲者未必終不得之誠知重其常職而
不以予於命者易之也然公自謝時今僉事君朝鳳方
為弟子員公慨然曰吾祖父詩書之業有屬矣僉事君
果以甲辰進士起家贈公以所得官為刑部主事於人
之所欲亦烏為不得哉僉事君為進士使江西竣事不
受一帕束手歸覲拜公於堂喜曰筮仕宜若此庶幾不

辱為賢哲後矣然有進於此者兒子勉之公妻贈太安人金氏處州太平府訓導公核之女媿德于公公教子嚴安人能不以小慈敗其訓公疎於生事安人能不以欲富撓其高事方伯公與姑蔡孺人孝敬無違治門內之政賓祭中禮衣食有節旁施下馭條法斬如也公晚自休窮山水之美以昌其詩由安人為之內也公以嘉靖丙午七月二十日卒而以戊申十月與安人合塋於馬家前山從先人之兆蓋安人前公卒九年矣僉事君

按閩使至清源山中以墓上之碣為請且叙其姓所由
復曰吳氏台州仙居人也宋太師康肅公弗初為樂清
尉弟荆從焉娶於北閣潘氏因家樂清是為北閣吳氏
荆生芳大芳大生世簡簡生德甫甫生日起起生開宗
幼孤依母姨夫南閣章希恩以居長而從其姓仕元為
德清縣典史開宗生性性生新民新民生文寶尚書恭
毅公之父也然方伯公皆與北閣吳氏叙宗而姓仍章
氏以先世之恩未遠而不忍也顧其志存焉故吾先君

以先志責朝鳳且幸通籍於朝而得請也今之為吳氏
吾祖之志而先君之教也嗟夫是亦公之知所職以肖
其先之事也銘曰

顯顯尚書朝之大忠奮義徇國不有其躬所徇伊何庭
有壽訏英廟狩還南內部封檢夫觀釁危及儲宮集議
闕下千官震恫顧軀戀孥草仆隨風背汗胸顫莫敢異
同噤不出聲喉咽有春尚書其時儀部郎中義形於色
叱闕 疏入極諍闕 龍敲榜鑽灼死靡悔恫三

歲繆拳肌瘡出蟲且登于天釋幽躋融守道匡時大節
始終書于史氏跡名駿鴻孰是孫子不念休美胡以念
之曰先是似胡以似之蹈仁服禮穹階峻秩有貽先耻
公阨于遇而力為士我最公行是為肖子詩于隧石其
永不毀

附碑

撫寇碑

汀漳於閩為要郡上杭汀巖邑也邑溪南之鄉崇山造

天牙錯距躍隴阪緣巨箐薄密綿其民狎為非義獐噬
狙攫席衽戈甲禦寇無時風氣所限非性故然長子育
孫生蕃齒盛耳目習熟莫改厥德少視其壯壯視其老
蹲危逗幽迺為盜藪厥有治者不揆其性不閔其習盜
視彼民忿獷聖凶攻擊剗鋤如農疾莠惟懼不殘民不
見德又弗儆威既狃於習且偷其生鵠張螳怒攘奮跟
踣吏既讐民民亦毒吏讐毒兩積交不得已於是溪南
之民惡聲膠固歷彌年所前滌無繇豈不悲哉嘉靖癸

卯之歲郡丞繆侯宗堯移攝事聞而嘆曰安有為吏而
民寔讐在邑所治處溪之南而視若異壤民之不義惟
為吏者之責吾將為溪南之民湔滌惡聲登濟維新偕
之大道發教布令開以誠心民聞不疑選日戒徒往泣
其鄉而教諭梁君彥錦寔贊繆侯之計而決其行乃與
訓導郊君夔率學官弟子丘道充道南李如珠賴榮先
從焉戎器不除卒旅不具雍雍翼翼冠蓋斯戾魁首醜
黨部勒有次稽首馬前爰崩厥角扶旄提倪觀于周道

歡喜歌呼激越林莽昔為魁首今為長正昔為醜黨今
為編氓刮癰洗瘡復還骨肉撥霧掀瞋再覩白日民視
繆侯如出子寄孥久離乳哺一旦還歸婉戀膝下始識
慈母民視梁君如騃童驕孺未識衣冠驟謁師傅拱揖
步趨盼顧驚喜吏既誠民民亦懷吏周行疆畎攷閱壁
壘曰險爾平曰翳爾闢曰萊爾易迺犒牛酒迺給耒耜
迺分麻縷迺置門塾男耘女織各得其業戶誦家吟知
慕為士向之盜名棄去如脫溪南山川出垢遺濁光色

發揚蒼蒼濯濯嗚呼是溪南也在昔若彼在今如此烏
覩所謂習哉吏不能以誠撫民而惟頑之疾民之不得
其性者可勝道耶梁君今為泉州南安令以繆侯撫寇
之蹟告予曰願有記予不識繆侯而知梁君之言可信
故特書之貽上杭之民使勒之石以昭不忘

膚功遺愛碑

蔣維業劉伯需踵門見予衣履菲陋貌俚而視野予不
知其何為來卒然言曰將有請予怪問之曰吾漳州龍

溪大地里人也巖棲而隴耨作息在溪壑之間以其幽
昧荒阻居之西園常患盜焉苦之而不能禦是歲八月
汀漳守備俞公以督府之檄來徵盜盡得之吾等不忘
其功將勒之石予曰守備逐盜而得盜職也若何石焉
曰吾等深有不可忘者不獨以得盜也凡盜之攻奪吾
聚落避之猶有可免哀之猶有可丐而吏士之逐盜至
者進無可丐之門退無可避之路甚哉其莫之哀而不
得也故未嘗有得盜之功而重以播民之虐今俞守備

之至吾地禁戒肅而約束明卒無敢喧于閭吾安吾栖而治吾耨作息循旦暮之候而不知兵之在吾境老稚嬉遊以閱俘馘之過而無變容驚已之虞畜之字於埭者可數而收葵之在園者莖葉無所損老詔其少尊語其卑不圖生身以來獲蒙此幸壺漿斗酒之饋却而不嘗山織野繭之所治又不敢以獻相與鬱而不鬻謀所以報之其術無繇是以敢冒然而來請也二人者田野之人也其言質而慤予怪其知不忘俞公之德而又知

來請予之文孰謂野人而不知禮哉孰謂野人而不知
好義哉吾何說以辭之哉遂次其語以畀之因名其石
曰膚功遺愛使歸鵠之以旌俞君之伐以不孤二人之
勤而慰大地里人之意俞君名大猷字志輔以泉州衛
百戶由武舉歷陞為汀漳守備署都指揮僉事

湖水利頌德碑

邑東南鄉之田皆仰水於湖其浸鉅而灌博者龜湖為
最環湖而廬且萬家支村析聚櫛比衽聯總其鄉之名

曰龜湖蓋以湖名其鄉也寶蓋金鞍玉屏諸山之水醞為四溪流入於湖瀕湖仰水之田度萬餘畝民蒙其利而不能知其始所由作惟畜泄之節淤決之禁畧列科條謂之塘規者知其始於宋蔡忠惠公襄守泉時所留也號湖以塘蓋邑俗方言云湖水之利於田若是博故有隄以捍海堰以墮潦坊以瀦止庸以宣流而嚙淫潰決之害必有資於人力歲治月修然後無害水庸之啟閉有惰以妨時有奸以病衆而豪右之侵爭狂狡之盜

詭皆所以為湖之患其具不得不出於政刑所謂規者實於是取之由宋至今殆五百年守陂之夫雖具而官弗予直故守者常怠而廢事民以請於前守方公克視篆節推袁公世榮議協于民為請於部使者既許而二公去莫之行也屬南衡童公來守郡以事行治屬問民利病而龜湖首及焉民方欲言公顧就而問之於是有以前議得請為言者公即符下晉江無留牘又盡民之所言繙牘得為所增議塘規二十九條行之其鄉公善

以寬碩接其民使樂於有為不待撻罰而相戒以率禁其勤也無斗酒尺帛之勞而自勸湖以無患比歲薦登田入羨倍粟溢他鄉人皆以侯之福我也相與伐石勒公之德且期以申敕是規之詳於不廢也觀古治民之利以循良見稱其善非一而水利之興脩為最鄴之白渠蜀之離堆楚之芍陂越之鑑湖尤其著者也作者非不欲為無窮之利而脩復之功每有待於後人蓋民庶乖分世祀遷易則弊萌蠹穴伏於其間如芍陂作於孫

叔教至何武鄧艾劉頌魏欣趙軌歷數世皆以有功於
陂為民所記而馬臻孟顓尤有記於越以鑑湖之功也
觀其所為如伐木通榛以納衆流增闢水門益廣灌溉
計功受分使大小勦力與夫禁民墮湖為田立水約以
裁貪爭皆於續規脗合蓋古今異便而水利興脩之宜
不越此也斯規之有裨於湖而不足恃以不廢法固有
待乎人者故予特為記之非徒副民之請以述童侯之
德將以遺後之為政者於無窮云

刻招魂章碑石

泉之為郡東南履海延袤迺畫岸為疆如循衣裾緣
岸曲折蟠屈人營其間以居對視列島隱見出沒烟濤
雲浪間錯落若置碁聚塊皆蠻人邑國也無重關穹壁
斷蹊絕坂之限舟浮水面負巨颿而行日可踔數百里
島外諸國皆有奇產異物珍瓊怪詭邀利忘生之夫枕
席大險以牟鉅贏故泉之盜患莫劇於海嘉靖二十二
年夏五月盜犯深滄鎮深滄於緣岸之居聚人為衆而

據地為固民相率糾義以禦之吾郡別駕陳侯少華方
司郡徼督捕至海上聞深滬之民將率義禦賊檄而許
之民既奮於義以相保聚比得侯命益堅且奮盜鬪不
能勝獲其魁首殲其黨奪其舟兵盡島外諸蠻也吾民
鬪而死者二人傷者亦若干人侯親為撫循勞定振護
賙給民皆洗瘢刮瘡迅踊而起忘其為創也又哀死者
之不幸為賦招魂二章以祭之民之鬪而不死與不在
鬪而存者雖有智有愚於所賦之義或解或不解莫不

感誦嗟嘆激於脾肺播於齒頰謂侯之能用我也自農
不為兵而攻刺擊殺之事不任於民而死者又人之所
甚愛難者其所難犯世之患盜者固以為無可用之民
視盜之猖披潰決莫能措一籌其間其亦未覩今之事
乎庠生陳邦奇深滬人也所謂智而能解其義者也將
摹侯之賦刻諸堅石以繫其民不忘之思而乞記於予
侯詩詞閎富妙麗絕出一時所為招魂之章酷似楚人
當別行於風騷之場予故不論而獨著其能用民以備

御者以授陳生使歸刻焉

遵巖集卷十四